

番外書冊

124	二六二〇三	和書門
一六九	函	類
五册	架	

庫文閣内				
三〇六	二六二〇三	和		
四架	五册	書		
	號	類		

詩集文集

内閣文庫	
番號和	26203
冊數	5 ( 2 )
函號	206 53





臨川全集卷二

七言排律

示朝鮮李學士并序

菽陽廣陽臨川田革著

淺草文庫

大凡男子生而有弧矢之設是欲大其心志以贊  
國家之化成也故龍蟠之士鳳逸之賢常涉萬里  
以達磊落之氣如子長登會稽太白遊楚澤寔千  
載之美譚而當時以為奇特矣惟明公亦其人耶  
今代昭明四海一家遠奉榘役修盟此方太陽  
所耀洪波所激固非尋常觀覽則其著於詞翰之



間者跌蕩翱翔從橫變態讀之使神魂飛揚是豈  
 後生晚進體規畫圓準矩作方之比也哉曩偶識  
 荆飽挹賸馥盛眷所傾深以鏤刻然嚴程忽忽不  
 獲屢接雲談為恨莫大焉嗚呼盍簪不久分袂在  
 邇殊方各天再會難期則不得不戚戚焉預銷心  
 骨也仍構近體仰瀆電矚非獨寓惜別之忱將以  
 為他日篋裏之容顏耳

碩德宏材鳴樂浪一時從使到扶桑身游六藝漱芳  
 潤道貫三才涵洪荒詩陣爭鋒連斫壘騷壇樹幟獨  
 專場十年笑我菜鹽學萬卷羨君文字腸驀裏籜雲

寧受轡飛菟超海不勞航腰間雄劍氣如竦頭上玄  
 冠鬢未霜歷覽山川馳彩筆盡收風月納奚囊雍容  
 已見充觀國慷慨何須賦陟岡異域論交情最厚盍  
 簪把臂話偏長卑微姿似蘿縈石懸戀心同葵向陽  
 無奈嚴程難久住故攀清徹惜餘光天涯地角重回  
 首弱羽沈鱗兩渺茫

奉輓太湖淺君

鬱然舊業舊經綸故向朝端為虎臣直節清標傾閥  
 閱顯官豐爵庇簪紳威名早屬干城器德望優歸廊  
 廟珍祗願遐齡齊海嶽豈圖精爽上星辰山邀丹旆



照窮谷風送素車起暗塵鄭國昔聞傷子產漢家今  
見哭平津追陪曾賦瓊筵月夢寐猶懷畫閣春十載  
光陰唯瞬息千般世事幾悲辛徽音永絕絃難續館  
客空存鬢易新他日韓陵編墓誌一篇遺懿潤貞珉

次韻原來齊老人元日

龐眉鶴骨老崢嶸宿德衆推漢五更身上劍冠多喜  
氣胸中丘壑藹高情鑑明難掩妍兼虫瑟妙不論虧  
與成幾日望塵欽懿範何時跋燭話平生圖書笑我  
久簪筆鼎鼐知君行調羹臭味粗同居亦邇恨將胡  
越賞新正

七言律詩

佛通寺

寺在府東御許山釋愚仲闢而居焉古杉一株山中之舊物也

御許山前未暝鐘含暉院裏倚唵筇繞檐寒玉千竿  
竹夾徑風笙萬本松澗水潺湲消歲月顛雲縹緲盪  
襟胸昔時愚仲經行處百尺青杉涉幾冬

棲真寺

寺在府東應海山土肥實平所建其後釋佛照來居于此

山行何憚踏嶙峋路入禪關景正真一道松風鳴梵  
貝千尋瀑布掛天紳實平肇闢伽藍地佛照宣修香  
火因試上峰頭窮活眼東南海澗更無垠

七里渡



渡頭殘月影沈沈七里烟波曙色深  
船脚催人爭解纜棹歌攬睡坐披襟地分勢尾通潮汐岸隔東西變  
語音灘上不論名實異清風欲起子陵心

吉原驛望富士山應命

天教芙蓉嶺壓扶桑積雪峻嶒冲彼蒼仙竈燒餘丹鼎  
藥神雲遮住白霓裳一時行客屢回首千古詩人空  
搜腸仰對孱顏言不盡驛亭徙倚到斜陽

謝人惠菊花

霜飛陶徑菊猶存採摘寄來助晚飧  
細嚼金英漱芳潤繁浮玉蕊滿清樽  
胡公昔日誠添壽楚客千年空

斷魂賴有秋花勝梁肉世間不用慕熊蹯

詠雪

霏雪初晴風滿江貪看積素壓鴻龐  
詩人玉屑映書案文苑英華照紙窗  
萬嶽藏姿皆戴笠千林改觀盡垂幢  
試將白戰較詩力誰向騷壇築受降

謝人惠魚及茶

鮮殺佳茗兩非輕遠向寒厨寄厚情  
邾子盛飧欺魯國丹丘珍味壓烏程  
馮驩不用彈長鈇陸羽何辭洗破鐺  
一片先嘗盤上炙繩床支枕聽瓶笙

櫻花



一樹枝高半出墻暖霞相映闕春光臨風竊比玉人  
舞帶雨巧成宮女粧穠艷惱心難下筆幽芳攪睡枉  
搜腸花中十友無顏色莫怪吾邦特壇場

舟中

浪華猶在數峰東雲海蒼茫路不窮明石霧飛帆漸  
隱生田樹茂薺彌濃一篇唯慕玄虛賦萬里難乘宗  
慤風昔日源平戰爭地灘頭弔古憶英雄

海亭矚目

亭上羣山臨海岸翠巒日日倒玲瓏千尋波浪窻櫺  
外萬里風烟几席中勝地從來堪縱目扁舟此去欲

浮空更無佳作答佳景南北悠悠媿轉蓬

次韻醫生鷗潭見示

崑岡投玉識才優玄髮盍簪破舊愁開口風生三寸  
舌揮毫氣壓五丁牛丹楓黃柳照書案白日青山映  
畫樓一滴清涼上池水觀瀾不減泗濱遊

經楠子墳

墳在攝之湊川距墳二百步有寺曰香巖堂中置正成兄弟木主以

奠焉至今不以絕又有采幣一握即麾之類軍中所持以指揮士卒者元弘之亂正成受命於危難之間而勤勞太多矣及帝之宣祚也政綱不振兵戈復起正成知其不可而不死豐功盛烈載在國史焉

精忠雄畧更無倫王室安危係一身慷慨留孤櫻井



驛從容擲命湊河濱青編長照姓名顯采幣猶存手  
澤新道傍石碑如峴首泣題文字弔遺塵

送木鳳洲歸馬嶋

壯遊遠到藝陽城一接襟胸江漢清少日早修弓冶  
學高門行見子孫榮雄風奮藻三秋氣滄海懸帆萬  
里情愛惜寸陰莫虛擲青黎燭下即雲程

次謝鳳洲見寄

疇昔剪燈歡笑同索居此日思無窮寒霄影潔廣陵  
月滄海路遙馬島風鵬擊天池誰比翼龍飛雲漢特  
爭雄交情不隔烟濤外千里詩盟尺牘中

對雪

朝來霏雪遍江城隱几靜聽灑竹聲金錯無謀賒臘  
味村鐘有待報新晴冷梅含凍未饒笑饑鳥刷翎不  
肯鳴欲賦小詩何以述空义雙手對陶泓

秋日偶成

東郭移家歲月深復看秋色上園林狄籠護病猶收  
藥杜酒買歡不惜金粘壁蝸牛時作字近階蟋蟀夜  
鳴琴龍鍾自笑殘軀殼銷盡平生鐵石心

寄北可昌

舉時皆是慕浮名獨有高人醒且清動靜體胖方寸



廣行藏道大萬鍾輕一家圖籍真堪樂滿目雲山豈  
負盟投老優游仁壽域風流想見鄭康成

次韻醫生鷗潭見示

椿萱棣萼叙彝倫奕世風流出俗塵微雨焚香消獨  
夜新涼奮藻坐清晨薛家三鳳皆屏迹荀氏八龍共  
並輪珍重平生醫國手又將文字助經綸

書懷

山雲水石是良朋衣馬何須慕五陵快活難開今日  
眼逍遙堪曲古人肱已聞市虎亂真偽又見屋烏生  
愛憎勇退急流男子事安閑宜對讀書燈

留別木先生

宦游此日向江東絳帳欲辭思不窮行路遙連千嶂  
外別腸難寫一詩中只應書劍長隨我早晚琴樽又  
對公岸上蹈歌催解纜自今莫惜勞秋鴻

次韻冬夜偶成

倦遊同在瀟湘左寤寐常懷三徑松一點窗燈猶照  
枕半林風葉自鳴冬雁聲遙度寒江月客夢偏驚遠  
寺鐘早晚鄉關修舊約放情丘壑各銜鍾

次韻文石見示

詩林欣遇醫林客唱和恰如奏大章學海奔騰三萬



頃筆鋒鏖戰百千場碧窻晝靜對書案丹府夜暎試  
藥湯病懶久懷泉石志憑君直欲借青囊

詠竹

翠袂綠顏最可人歲寒相見更相親枝頭結實來靈  
物林下掃塵招隱淪千畝好音風戛玉十方清影月  
傳信此君元自似君子直節仰高淇水濱

次韻

荏苒光陰髮雪生此身何用利名榮醉中成趣詩千  
首忙裏偷閑棋一枰故國音書猶有信少年功業更  
無情莫將新舊論交際四海從來皆弟兄

次韻武田衡早春見寄

曛曛日影春猶淺迎暖家家歌鹿鳴幕府風從關左  
起藝園花向筆頭生三明宿昔雖仇迹二陸祗今最  
擅名千里詩盟如咫尺自憐飛翰接時英

秋日友人見招席上探得琴字

雨餘秋色上千林數片塞鴻驚客心筑嶺白雲遮望  
眼士峯霽雪滌頑襟人逢暇日爭搜句菊向閑庭特  
綻金一榻清談真率會吟聲相答勝彈琴

除夜書懷

旅館幾回逢歲除天涯久客賦歸歎宦情似紙番番



薄世事如毛箇箇疎曆上修移寒與燠人間休問毀  
將譽故園賴有一區宅他日宜藏萬卷書

偶成

旅館睡回香篆殘退公半日得清閑羣書堆案聊遮  
眼老樹滿庭更慰顏道體流行雲致雨天機活動鳥  
還山此時此景無人會至樂默存方寸間

岐蘇山中偶成

路入岐蘇似蜀中幾人到此感無窮溪流百折雷聲  
轉棧道千尋龍背崇老樹籠雲疑帶雨寒巖障日欲  
摩空鄉關西望猶迢迢早晚還家醉語濃

寢覺床

爛柯乘鶴悉荒唐浦島遺蹤更渺茫舟楫變為青石  
滑釣絲留作碧蘿長溪邊難認登仙路山下空餘寢  
覺床不識玉函在何處白雲深鎖樹蒼蒼

次韻木巽軒見示

辛卯夏西歸之日偶入京師而淹數月寓居中屢會

於習齋東翠二僚友而討論文論詩一日習齋席上邂逅巽軒木君雅談罪罪賜以雄篇面雖新知情頗白首銘刻之餘不能藉口猥塵韻末以供莞具

漫遊此日到皇城萍水相逢肝膽傾舊業羨君耽翰  
墨冷官笑我縛簪纓風塵回首纔開眼詩酒論交聊  
慰情賴向盛筵對佳客直教心地十分清



次韻喜清在見示

清在伊勢州人素工詩律久負盛名接武元白差肩

李張而其平日所著溢囊累牘殆數千首風雅之志可以尚焉嚮偶一面惠以四韻薰誦

圭復不忍釋手感刻之至牽強為謝非敢報也永以為好云爾

詩壇久已仰英名聊藉雄篇鋤頰荆氣吐虹霓光璨

爛胸盤雲嶽勢崢嶸天涯交義千金豈世上浮榮一

葉輕神境從來真樂土閑居應不羨登瀛

示喜清在

清詩句句闕森嚴恰似邪干出寶函健筆豈唯敵顏

柳妙音可復繼英咸誰憐鴻鵠謝羅網自笑驪駒受

轡銜書癖與君同嗜好區區何用辨酸醎

九月十四夜偶成

東方九月十三夜賞月繼于中秋蓋自寬平延喜來

有此舉而其稱一言月者乃宇多帝之所謂佳月勝中秋此其權輿乎余頃不言詩累月

矣中秋宣陽已不有詩昨宵亦無詩佳節好景泛然瞥過不知詩神謂何今夕月色清朗

頗動詩興聊拂硯塵以償前債云

澤國茫茫鴈向陽秋容淡淡滿庭牆山前日落松杉

暗籬外風來橘柚香小閣捲簾天似水低窗徹燭月

如霜新詩聊償昨宵債又把一杯獨自嘗

次韻朝鮮東郭李學士

千山搖落葉飛輕萬里怒濤氣不平遙掛錦帆冒溟

渤高移文旆到金城淋漓李墨薰心馥璨爛吳牋照



眼明四海弟兄良有以新知深荷一家情

千山詠示李學士

海內具瞻泰斗名文旌到處龔郊迎衣冠典度從周  
禮道德講論慕孔情明月囊中長照夜春風筆下忽  
蜚英三都賦就已經歲定識樂浪紙價轟

上朝鮮通信正使趙公并引

星軺遙臨上偉簪紳之觀玉節暫駐下慰布帛之  
望恭盟無違優禮具備於戲盛矣惟其大哉爰欽  
巖瞻竊慕風采恭裁短律式祝鴻休

平原望族舊貂蟬勲業才華冠世賢奉使共歌三代

德結盟永祝兩君年箕邦典度鼎鐘宣桑域山河柱  
石堅料識載馳功畢日萬人鼓舞見榮旋

上朝鮮通信副使任公并引

擅名雄都振經綸之駿業奉使異域展幹濟之鴻  
材水陸艱難舟車跋涉天人眷相動定亨嘉肅貢  
烏絲庸伸燕賀葵傾所至荆識為榮

經術史才特擅塲我冠摺笏在鸚行瓊筵朝坐金鑾  
殿萃燭夜歸白玉堂海國秋高移鳳節江天風靜駐  
龍驤吾儕空懷披雲志帳下寧容替戾岡

上朝鮮從事李公并引



錦袍已奪夙登擢雋之科珠履高步終恊觀光之志非唯一身之慶實亦闔國之榮無繇鳧趨徒切鼉望敢奏擊壤以資軒渠

仙輶高擁下秋空籍籍姓名動海東家世遠傳周史學詞林大振鄴侯風已於天上攀丹桂又向人間吐彩虹聞道狄籠有餘地甄收應不及苓通

三使有和章正使趙恭德詩云客窓痴坐等寒蟬黃卷蕭然對聖賢月掛半檐天似水鐘鳴古寺夜如年三秋遠役直溟盡兩國歡盟百世堅最愛臨川多秀句幾時傾蓋好周旋副使任守幹詩云聞

君文彩冠詞場妙譽青春出輩行忽見新詩投旅榻催呼明燭坐萃堂今來異域觀風遠幾箇英才奮首驤萬里壯遊奇勝足清秋弭節富山岡從事李邦彥詩云峩峩粉堞挿晴空大坂繁華擅日東百里帆樯迷極浦千家橘柚擁香風連雲疊樹疑噓蜃跨水長橋見卧虹盥手更吟才子句好音何待狄鞮通

示南泛叟

奮藻共期駭八紘吾人何用對鷺鷥秋天氣爽添詩力客舍興來寫旅情交際休論新與舊時流宜辨濁



兼清唱酬方識襟胸潔今日爲君肝膽傾

示李學士

紫氣西來人似龍文章海內特稱亨蕭蕭襟懷三秋  
菊落落清標千歲松已見新詩驚比屋又知絕業拂  
羣庸遠遊不負懸弧志定有功名上鼎鐘

安膝亭

亭者土人某氏之別業而其所謂萬年巖洗塵橋皆亭下之勝槩也相傳

澗水潺湲石逕迢萬年巖畔洗塵橋一林楓日飄雲  
錦半壑松風鳴洞簫茂樹蔭濃連峻嶺行宮蹟舊沒  
幽堯登臨頓覺襟胸豁安膝不須羨麗譙

次韻謙堂示華溪

綠暗紅藏春正深都將疎懶抹光陰青山雖負當時  
約白髮須看異日心弊帚自珍非待價孤桐未爨爲  
知音病來漸減讀書癖故使諸君職轄襟

題友人書齋

竹几繩床安病身漆書銅器不生塵朝陽曝背碧窓  
暖夜寐養神丹府春出處無時宜適意窮通有命豈  
尤人從容自得工夫足分外何論富與貧

謝惠芍藥二首

一種燒嬌世所稀數枝相贈到詩扉新收堪賞黃腰

歸川集卷之三十一 題友齋



子舊譜休誇金帶圍玉色徹宵侵粉壁國香盡日透  
書帙此花要是豪家物穠艷不應合布帛

的爍枝頭照眼明  
豈跼累萼弄輕盈  
玉堂風暖翻金  
葉蘭署日高歌絳英浩態豈唯供盛宴芳根可復助  
珍烹天桃穠李皆輿隸占得花中真宰名

吾廬

明窗淨几不生埃盤磚解衣賦快哉四壁纔成容膝  
計一軒聊為讀書開床頭常有古人伴門外更無俗  
駕來莫笑吾廬環堵小胸中百尺築靈臺

次韻謙堂贈別二首

厭聽離歌動水濱扁舟明日欲辭秦一年燈火同交  
臂半夜江樓共慘神長路等閑甘作客微官容易解  
纏身謝君送我裁詩句到處高吟夸耀人  
多病只宜釣澗濱遠遊却作學儀秦家貧不嘆食無  
肉才拙寧期筆有神意氣猶存三尺劍乾坤聊寄一  
蓬身東塗西抹將頭白慚愧腐儒牛後人

冬夜小集

席間有白氏長慶集

樓頭纖月塞鴻聲時聽淒風繞屋鳴團會暫忘鄉井  
念淡交長結歲寒盟幾盃白墮酒無算一部樂天詩  
有情此夜盍簪非俗客劇談不厭坐殘更



再疊前韻奉謝主人

醉後鏗鏗擊缶聲不容鼻息作雷鳴寸心雖為形骸  
役一念寧違丘壑盟廷尉雀羅新俗態臣卿雞黍故  
人情客中日月須詩酒莫把髮毛嘆歲更

春日陪宴應命二首

城北相攸占地雄飛樓傑觀勢凌空檐邀雪嶺寒光  
動園簇烟花淑氣濃錦幄滿庭圍繡砌綺筵盡日坐  
春風游豫不肯違明戒一體君臣和樂同

天公能識我

侯來更使勝區勝景開脩竹

篩金連澗水長松傾蓋覆春臺林花縵舞如臨宴谷

鳥齊歌似勸盃滿坐侍臣供紙筆不知誰是八叉才

巨鼇山頂望海

千歲鼇盤東海頭幾人來此縱吟眸天池向曙金輪  
湧蓉嶺連雲銀闕浮絕景屢投詞客筆雄風長送旅  
商舟登臨欲學觀瀾術我輩寧比物外遊

中秋

九霄雲盡月行遲一夜人望不識疲露濕桂華滴沈  
澹風搖玉樹起填笳畫舫興熟袁公酒金餅才高蘓  
老詩飽挹清光唵未了樽前撚斷幾莖髭

九月牛山小集



落木窻軒四面風高憑危檻望秋空一川南下水容  
潤萬嶽北支地勢雄疎雨淡雲朝暮變飛鴻鳴雁古  
今同牛山寧效女兒態醉對東岡巖菊叢

樂只亭

家所森宣氏嘗居顯職見遇殊厚去歲卜地於城  
南以為休息之所而其山水之美林壑之勝不遑  
枚舉可謂一方之壯觀也一日我

君侯親至斯亭而飲讌焉乃擇其名命之曰樂只  
蓋人之性有適其意則樂然能知其樂而樂之者  
或鮮矣事物交於其前利害戰於其中則雖遇其

可樂者亦不知其樂之為樂也古之能樂者異於  
是不枉其道不辱其德行無所牽止無所扼四海  
八荒卷為我有此豪傑者之樂而樂亦無窮也森  
宣氏之所樂果是耶不耶余常視其為人固非  
為事物利害所累者則知能樂其樂而不愧於古  
之人矣况其平居奉

侍

公之際忠貞渾篤慎勤有餘年過耳順體猶壯健日  
君侯側共樂其樂進亦樂退亦樂其樂不大且廣哉  
由是觀之以所謂豪傑者之樂為已樂者非森宣



氏而誰善哉樂只之名亭也後之為子孫者能回  
 其蔭以安其業繩繩綿綿永享其樂則庶乎斯亭  
 之不朽而其名之不虛矣身之作文具記其事既  
 而又請余書其顏仍書贈之副以一律云  
 亭子高連巖岫成

君侯親至有餘榮山開風氣千顏麗川蘸日光一道  
 明翠黛南凝仁保島粉墻北峙廣陵城此中投老知  
 安分俯仰不慙樂只名

偶成

富貴功名兩渺茫更於書卷得深藏衡茅四壁相如

宅良藥千金思邈方劍挾秋霜支病骨酒驅風火鼓  
 詩腸紛紛何用三十六一味安閑策最長

洗心亭并序

谷雅忠翁致仕之日築亭於比山之下以居焉一  
 日余與同志來飲于此風雲初霽山川秀麗四望  
 一覽坐盡東南之勝於是洗觥斟酒以屬主人而  
 言曰美哉山水主人亦樂此乎夫天地之間一氣  
 而已結而為山融而為水結者靜融者動一動一  
 靜互布其形此乃吾道之一大機會一大頭腦君  
 子體之日崇其德小人反之日失其常可不察歟



主人嘗以顯職居要地一日萬事不能無毀譽得  
喪於其間而求其所由則又皆在人而不在己豈  
可屑屑然爲之喜憂哉既而解印投紱屏迹丘壑  
永享仁知之樂而無愧於古人焉比之尋常浮薄  
之徒其間相去奚翅霄壤主人曰博哉言也將何  
以名吾亭曰凡人執熱則濯蒙垢則澡主人之於  
此亭亦猶是乎山色以洗其目水聲以洗其耳雲  
烟竹樹以洗其腎肝肺腸則一身全體無所不新  
而方寸明明自無塵埃之污矣請命之曰洗心主  
人曰善遂成四韻直以數言云爾

突兀高堂對翠岑一藤半日寄登臨乾坤遠大從窮  
目雲水蒼茫供洗心物外真堪拋歲月人間何用戀  
纓簪笑持玉爵酬猿鶴聽取岡頭快活吟

讀史

嬴秦那得久強梁天使人心歸漢皇貪暴築城連萬  
里寬仁約法止三章焚書謾作火坑大習禮宣觀綿  
蕝長賴有斯文猶足徵分明千載鑒興亡

次韻杏溪早春見示

節物登盤薺菜堆碧窻黃卷掩還開春風眠足陶潛  
柳殘雪香飄何遜梅衰髮將疎頻攬鏡宿病未愈罕



御盃新年遙寄杏溪信撩我復教吟興催

代木先生次韻崎泉

夙入儒關闕夏商聲名籍籍滿津陽文章氣壓曹劉  
辟翰墨風傳班馬香雲樹東西三百里燕鴻上下四  
十霜蓋簪此日莫辭醉歡笑不妨戰堵墻

池鯉鮒驛走示主人并序

余嘗以西歸之日過遠之池鯉鮒驛亭之主人使  
余書字賦詩既而五年又到此地水陸之險跋涉  
之難夙夜役役未肯遑休豈不太勞哉然亦或一  
遇其所好得其所適則發以文章述以詩律此乃

翰墨者流一大快事而不可與俗客道也因舉一

爵以屬主人併書所懷贈之

歸途迢遞向西秦此地宜來訪主人水滿池塘魚潑  
潑雲開林嶽樹蓁蓁一樽攜手聊尋舊七字搜詩更  
闔新顏柳有靈應笑我薑芽無筆運千鈞

次韻春雪

風闔冷嚴等臘天春來滕六又專權空庭喬木猶含  
凍老屋寒厨未起烟山擁瓊瑤瑩更麗川回組練遠  
相連高堂一雪真無價清興亦應不道錢

喪妻



夫妻恩義兩非輕，永訣如今難割情。三世日緣隨夢  
幻，百年仇儷隔幽明。孤鸞猶戀鏡中影，獨鶴空驚絃  
上聲。幾度欲尋偕老約，白雲無路到蓬瀛。

中秋無月

誰家酒亂復詩忙，風雨蕭然一草堂。心上有秋人自  
老，窗前無月夜空長。疎燈影暗已藏焰，花木聲高不  
待霜。獨卧寒閨聽點滴，滿襟幽思轉淒涼。

既古堂小飲次謝主人見示

庭中氣象似郊外，幽邃正疑小野塘。半樹殘花留客  
久，一檐飛雨送杯忙。魚牋辭好詩傳畫，麈尾談清口

弄簧我輩來投文字，飲酣歌莫笑次公狂。

次韻詠菊

滿城草木日凋傷，獨有此花更布芳。玉蕊細和三  
月金，英巧傲九秋。霜結隣常近，芝蘭室擇地敢登桃  
李場。晚節不須憂鶴髮，為君採摘補仙方。

哭田質夫

昨日擅名翰墨場，今朝收骨寄荒岡。櫃中忽碎荆和  
璧，紙上空餘班馬香。黃卷幾年論出處，青燈一夜感  
存亡。為君痛哭堪腸斷，白髮老親猶在堂。

豫簾亭井序



豫簾亭者立軒木先生居第後圃之亭而其上覆以伊豫州所出之簾是其所以得名也規模雖不  
 太高廣然臨水向山脚野帶郭九城西南北三向  
 勝槩舉集目圍不可究極於是先生日坐其上而  
 縱觀之曰優游之樂皆我

君侯之賜也已而作歌志喜又使子弟各賦近體余亦從其後以構一律

城北山川甲一州豫簾竟日縱吟眸千峯氣霽纖雲  
 盡萬竅聲闌爽籟收檐植松筠標晚節園垂橘柚照  
 深秋先生此樂所宜有猶道君恩無可酬

壬寅元日

意氣崢嶸四十餘今朝漸覺髮毛疎一官漫費太倉粟  
 萬卷竊傳內史書蝸殼猶欣逢節序鷄窻底用擲  
 居諸春來天地皆詩景檐柳庭梅亦起予

冬日同社友赴宴伴君之第

蒼蒼氣蕭歲將窮團會相歡翰墨中一室溫暄爐伏  
 火半庭蕭瑟樹含風締友不用論新故修道要須辨  
 異同日聖曰賢皆學力玉成莫闕漸磨功

癸卯新年

書幌熙熙透曉光起披春服向春陽廣城雲捧軒轅



蓋嚴鳴霞飄金母裳間巷歲穰人自樂園林氣暖物  
將昌一家百指皆無恙醉倚晴窗繙縹緗

甲辰新年

春臺遲日影瞳瞳特地韶光不負公穉柳將動纔拂  
水老梅未謝更含風詩書久擲簪纓念圖譜漸收鉛  
槩切笑對阿奴誇絡綉酒顏却勝頌花紅

途中偶成

一官未省就清閒又逐黃塵向武關萬里羈程春已  
老三旬行役鬢將斑深知旅食常違志聊沾村醪強  
慰顏直待秋風回轡日馬頭當復賦刀環

奉賀國子祭酒整宇林先生致仕

專門舊業舊青氈遠自羅浮洞裏傳三世興隆三代  
學六朝進對六經筵文章寧出曹劉後德望應歸荀  
孟先致仕優游仁壽域一家慶福萬斯年

代木先生次韻石龜蓮見示五首

神采依稀晉宋人風流爲擬更傳真一枝高種日邊  
杏千里長思江上蘋小小詩篇常斫壘茫茫海學不  
迷津他年雲樹豈回首記得樽前見在身

老來百事不如人鑷鑷羨君意氣真風月千鍾傾白  
墮綺羅一曲唱青蘋夜堂剪燭共話舊世路停鞭各



問津出處行藏皆有數寬閒終合着斯身  
越雪吳霜老却人頭顱雖槁尚心真儒餐偏愧食無  
肉野膳聊欣盤有蔬當日金張難仇跡即今沮溺好  
求津鷄皮鶴骨君休笑六十年前少壯身  
不作秦人視越人締交方識道彌真雨餘曾剪半園  
菲月下竊披一棹蘋解事假令如伯始求賢誰復似  
平津巾車段馬宜行樂未必羈韁到此身  
東塗西抹宦游人客舍蕭然猶養真落日斜穿秦嶺  
樹秋風早動楚江蘋逢迎俗駕鼻吞酢咀嚼新詩口  
起津千里鄉關歸去後豫簾直作自由身

豫簾先生  
居第亭名

次韻存堂鷹君秋日感興

頑陰連日不成晴南牖無端負月明書劍三秋官况  
味關山萬里故園情風流獨託青從事意氣誰憐白  
馬生須向人間細傾耳蠅聲時復亂鷄鳴

九日

擊柝聲寒鐘漏沈江城霜氣曉蕭森士峰風擁霞關  
起筑嶺雲連湘水深誰向盛筵宣落帽獨凭危檻更  
披襟故園黃菊應開遍無限秋光動客心

乙巳元日示諸僚

金城彩仗擁東曹暖靄蒼蒼映曙袍淑氣潛追花氣



動春聲更入雨聲高正知節物稱人意却覺年華上  
髮毛借問諸僚新傑作朝來壓倒幾詩豪

代木先生次韻梅文石見贖二首

世路風波不見涯如今誰作乘桴嗟何憂養病肘生  
柳却恐讀書眼散花老去久拋斷蛇劍歸來欲理釣  
魚槎謝君送我裁詩句情厚兩家猶一家  
萬物浮萍東海涯幾般世事不須嗟唯疑鐵撥彈驚  
座何用羅衣唾作花籬外雨過鋪駁蘚洲頭水落出  
枯槎秋風千里揮鞭去鱸膾蓴羹好到家  
元龍豪氣浩無涯萬頃相望唯自嗟園大更添橫月

樹徑荒猶種傲霜花離筵顛倒床頭缶歸路遙隨海  
上槎吳下待君回轡後黍雞往復阿蒙家

奉輓立軒木先生并引

先生諱虎字允明姓味木氏其先出自藤道長公  
而世有顯人焉先生爲人剛毅學識卓犖冠冕荀  
孟劍佩孫吳可謂文武兼備者也享保十年四月  
丁亥疾卒於家年七十六易簣之日猶命筆書詩  
字畫輕健如未病時余從先生三十餘年恩義交  
至哀慕無已敬構近體用代辦香

正知吾道日摧頽天使斯人去不回清淚忽先梅雨



隕悲風空逐麥秋來一時共惜聖賢學百世應思文  
武才咫尺城南山上土高封馬鬣鎖泉臺

丙午元日

瑞雲拂曙照書帷坐見韶光滿九維鉛槧偏供新歲  
計冠袍聊整舊容儀花開堯曆猶應節鳥弄舜絃自  
報時四海昇平同一轍共歌帝力仰雍熙

春日養浩亭小集

麥綠薺黃欲盡春不辭勝境往來頻千峰閣雨層層  
出萬木着花種種新酒熟自歌還自舞興闌誰主復  
誰賓席間偶見舊詩卷幾度高吟憶昔人

館中同諸賢賦燕子日長好讀書

綠樹陰森一雨餘南薰日日坐精廬園蜂鑽紙竊窺  
硯梁燕銜泥巧避書會友雖然論損益同心何識辨  
親疎諸君幸當多替古更向胸中築石渠

遊安國院

寺倚蒼崖壓一州連雲高閣照高秋檐前斜落千峰  
影檻外平牽萬里流求道已同過白社尋真何必到  
丹丘上方下視人間世欲把浮榮付海漚

示社友

橙林風日弄扶疎起掃柴門披竹蒲節過蟹黃潮候



惡天迎象白物光殊家貧大欠橘千樹園薄纔收粟  
一盂蝸殼留君賒綠酒更無餘肉潤寒厨

陪蘭州君遊廣胖亭

廣胖亭高廣胖名故開盛宴寫幽情朝端已慰邦家  
望物外兼尋丘壑盟青嶂繞檐邀杖屨纈林夾砌照  
杯觥謝公風致今猶古况復東山泉石清

丁未元日

是歲正月得  
閏故句中及

曙色蔥朧弄泰和廣城佳氣鬱嵯峨隨行竊避青驄  
馬趨仗猥鳴白玉珂歲穰八風方應節時清四海不  
揚波韶光一百二十日日日看花興更多

春日同諸契赴宴湖山箕君別業二首

山圍水繞碧欄東到底疑身在畫中花木淺深春未  
老烟雲咫尺望無窮池塘新過白鷗雨海國漸收黃  
雀風勝地盛筵誰敢記今年遊與去年同

年來種髮奈霜侵當即尋春及未深遺世祇知甘澹  
泊逢人那復避規箴手談時作多多趣口業猶餘小  
小吟坐客都無胡越態好將山水寄琴心

奉謝存堂鷹君惠牡丹

春深爲惜落花闌乞與君家赤玉盤富艷須要天上  
種妖嬌何比世間看香疑寶帳金鑪熱色訝瓊筵華



燭殘今日全輸舒學士空簪彩筆倚朱欄

同諸契遊空水菴

芒鞋藜杖遠相尋半日來參老道林修竹院幽禪榻  
淨長松洞古佛龕深案頭貝葉開真諦花外蒲牢送  
梵音碧水接空空接水一般空水一如心

遊紫雲招提

不堪世海更茫茫此地來尋參佛場池上寒雲籠日  
紫階前老樹着霜黃樓收經卷鎖龍象閣壓檐楹樓  
鳳凰莫怪法門携杖屨欲從靈運學空王

次韻田雪江生

正識胸中藏萬卷數篇麗藻吐菲芬羨君講習有新  
得媿我空疎無舊聞莫論世波清濁混要須心地是  
非分聖賢事業如星日振古道存武與文

戊申元日

朝雲釀雨翳金鴉漸見海風卷海霞千里江山回氣  
象一園草木動萌芽搔餘偏覺頭添雪醉後何妨眼  
散花滿腹詩書新歲計要將贊襄報邦家

送森蘭澗赴武江

男子從來輕別離此行須喜不須悲蜀都花木江如  
錦吳地雲山路似絲扈駕已成千里志探春應課



一囊詩請君他日早回轡直及岐陽微雪時

三餘亭賞櫻花

一樹千條萬縷長佳名久壓百花場臨風縵按婆娑  
舞經雨巧成濃淡妝白雪拂檐時有影紅霞滿架本  
無香三餘亭畔春將老醉向盛筵坐夕陽

豁然亭并序

太田某翁名其別業曰豁然之亭非亭豁然翁之  
豁然也凡亭之所覽隨山喬嶽大野廣川不能自  
豁然而回翁以豁然不知翁之胸中又有何等大  
豁然而能成許多豁然出來也余管窺之性素無

豁然樣子然於其所以豁然者略能言之而與翁  
共豁然於亭上則斯遊也亦服堯之服也安妨乎  
不堯安妨乎不豁然遂賦

杖屨城南數里餘民居窮處是君居眼中已富山兼  
水世上何求熊與魚四面岡巒青陸續千宣花柳錦  
扶疎登臨自得豁然趣靜見風雲卷復舒

上海量禪院

縹渺精藍瀕海開躋攀疑是妙高臺南溟潮與北溟  
合東嶺雲從西嶺來雙眼直籠千世界片心寧掛一  
塵埃上方欲扣人天事巖陁有僧振錫回



已酉新年  
 氤氳淑氣滿窗軒  
 淨掃繩牀坐晏溫  
 南嶽雲烟收雨  
 雪西郊竹樹擁川原  
 不材久擲千金帚  
 無用空藏五石樽  
 遲日紛然經濟業  
 此心我與魯生論

荊州登宣陽

海岱風雲氣正長  
 滿城草木老秋光  
 移家新甞二三  
 徑落帽謾逢九九陽  
 席上樽罍供瀉綠  
 鏡中鬢髮任垂黃  
 興闌少試登高脚  
 猶覺近來筋力剛

庚戌元日

滿軒韶色曉  
 葱蘢花竹欣然起  
 乃公身上青袍顏似

鐵手中黃卷氣如虹  
 少時漫踏九衢地  
 老境竊安一畝宮  
 大學書生多俊傑  
 好將春誦伴春風

賀蘭澗森君累官

森公閎閎冠群英  
 百世繩繩忠孝名  
 雨露恩濃從爵祿  
 烟霞光麗照簪纓  
 龍翔北野三千里  
 鵬擊南溟九萬程  
 深識祖宗功績大  
 高門適見子孫榮

湖山箕君水館次韻謝奉

渡頭潮落岸容低  
 枯葦半乾數寸泥  
 竹外結茅連草野  
 松間排石入苔蹊  
 但知載酒時收魯  
 未省聞韶嘗在齊  
 此日安仁雖老矣  
 敢將秋鬢嘆蓬兮



九日

秋陽如酒潑，窻間佳節小。齋坐小閒，何處樓臺能縱目。誰家松菊更怡顏。沙園霜重葉爭下，海國風高鳥自還。今日孟嘉猶病懶，無心落帽向龍山。

辛亥新年

池草欲青柳欲黃，廣陵景象接新陽。雲開海嶽銷妖氣，日照城樓轉瑞光。老境豈唯詩作癖，晴窻好是睡為鄉。年前大減米鹽價，到處會應春釀香。

春酒介眉壽得想

高亭春色滿霄壤，住此知君心自廣。介壽常歌南嶽

詩卜閒長望，西山爽海霞。鳴霧供披襟，汀草岸花入卷幌。風月人料風月，樽酒中寧作塵中想。風月樽主入所藏酒

中秋廣胖亭賞月次韻蘭洲岡君

風清月白宿禽驚，檻外秋光不世情。雲散倏看鵬翼斂，潮回方識蚌胎盈。華筵詩就彩牋響，瓊館酒酣錦瑟橫。此夜騷壇聞鳳嘯，追陪堪愧奏蛙鳴。

壬子新年

舊業依然雪滿頭，敢同俗態逐時流。枕中周易欽姬日，架上魯論仰孔丘。園小無葵供坐客，墻深有竹比



封侯春風雕琢閑文字亦被人呼為老劉

偶成

白首搔餘兩鬢絲春眠日日掩茅茨半瓶馬乳清兼  
濁一壁龍泉雄與雌多病久妨新進路倦飛聊掃舊  
棲枝西山爽氣依然在自是世人着眼卑

朝海亭次韻梅溪尾君

兩岸人家半掩扉酒旗搖曳影相依雲烟綜錯弄天  
杼海嶽融凝藏道機野濶牛羊時自下林深鳥雀晚  
方歸盛筵故叙彞彝倫樂棣萼聯芳接暖暉  
江上春興多

垂楊嫋嫋草萋萋特地江山特地春日照波濤紅漱  
灑雲籠巘嶧白嶙峋持竿時逐盪漿客携酒又隨着  
屐人到處登臨多逸興勝遊詩就不無神

梅溪尾君宅櫻花盛開君一日招社友賞之

余時在告詩以簡奉

聞為愛櫻作勝遊更昌詩律撩曹劉一株已壓百花  
本千首應輕萬戶侯嘉樹蜀山分異品英辭鄴水合  
清流何時得預賞春宴飽看滿繚鬪羣虬

送鷗洲尾君赴武陵

微雨輕陰楊柳天春風穩送帛蘭船鯨波浩蕩南溟



外蠶嶺崢嶸北斗邊勝地羨君多逸興送詩愧我欠  
雄篇武陵若問桃消息試向源頭更覓仙

秋日奉寄鷗洲尾君

秦樹葉飛已降霜遙知秋色滿三湘半宵魂夢供孤  
枕千里騷盟託短章海內應須稱孔李人間何必數  
金張清忠高義君家事前路莫追時世粧

癸丑新年

綈袍盤礴一蝸廬曉鏡那堪潘鬢疎四海均開新曆  
日半箱長守舊圖書闔邦年歉穀如玉滿地園荒蔬  
似魚堂上群賢經濟力春來更為理蝗餘

次韻中秋觀瀾亭敞筵

層軒秋滿興方豪蒹葭蒼蒼動楚騷雲翼蔽空銀漢  
暗潮頭衝岸雪山高纖歌遙舞月中兔健筆直牽海  
上鼉良夜盛筵賢主客盍簪何用辨牛毛

次韻存堂鷹君中秋

捲簾徙倚玉欄東咫尺清川與海通映水燈燒驚宿  
鳥近階急管亂鳴蟲唯看雲霧遮天闕不識姮娥鎖  
月宮賴有庾公耽翰墨南樓詩句動秋空

錢須鑑湖生赴洛陽

千峰爽氣滿秋空五兩高懸八月風滄海浪平天影



潤扶桑雲盡日華濃客舟已傍雁邊去鄉夢應從蓬  
底通上國元來佳麗地行遊莫入少年叢

中秋

大君是歲在武江即偶得疾病既而踰月乃告全愈故未句及

宿雨初收舞乃公芳樽齊望玉蟾宮寒光浮動乾坤  
外清影森嚴海嶽中衆樹葉鳴通爽氣半庭露瀼濕  
秋叢度樓此夜須歡樂驛報東來醫奏功

甲寅新年

天地恩深容乃公身安心靜坐春風滿頭絲與雪齊  
白登頰酒將花並紅百歲踈慵真有味

兩朝進退更無功詩成應被黃鸝笑謾畫胡盧樣樣  
同

川上作

新莊山下盪扁舟田野青青麥未秋萬嶽撐天皆北  
構一川赴海正南流廣城斜日紅初斂嚴鳴瑞雲綠  
欲浮回首烟波聊浩笑無窮詩思滿滄洲

再疊前韻

身世茫茫一片舟人間何用作陽秋招魂曾叩三生  
石濯足聊臨萬里流天外亂峰隨棹轉風前浪蘂撲  
樽浮荻芽蘆葉釣汀暮想見金陵白鷺洲



哭東臯子

咫尺丘原太不還，獨留芳譽滿賢關。生前志業欽荀孟，歿後文章稱馬班。舊事已隨東海水，新碑空上北邙山。淒涼三十七年夢，都屬黃梁半熟間。

秋日鷹君池亭賞蓮

亭下種蓮憶若耶，不辭吟賞坐昏鴉。環池齊偃小人草，蔽水遍開君子花。碧筍擁風擎翠羽，紅苞裊雨卷龍紗。清標自與姚黃異，送似應宜忠孝家。

杪秋同諸君上田君野亭

雨霽野塘暖似春，高亭秋色畫難真。風吹一雁過天

外雲捧千峰，出海濱。石澗環階，琴韻響霜林。障日纈紋新。晚來凭檻，遙窮目，十字街頭百尺塵。

秋日偶成 回文

流水野塘小，徑荒遠邛。寒景晚茫茫，舟膠草澤楚。天碧筆珥山，雲秦嶺蒼。憂解笑時詩，是境睡回起。處醉為鄉樓，高倚檻對斜日。秋樹錦林半，淙霜

乙卯新年

一官三十又餘春，蘿蔔叢中幾歷年。筋力日兼詩力退，鬢華時逐物華新。明珠萬斛知何寶，良藥千金只是珍。賴有寸心剛似鐵，東風奮發老精神。



壽澹然邛君四十一

久將鴻術濟斯民積善如岡臨誕辰肘後良方三品  
藥夢中祥瑞一枝春丹鑪火軟伏金虎畫閣酒闌留  
玉人他日優游躋壽域瑤臺羽客結芳鄰

義士

讐復志成大節全從容含笑入黃泉君臣千古綱常  
重父子一心金石堅擲命已能探虎穴奮身寧悔蹈  
龍淵英名三十餘霜下日月並明桑域天

喪女

殘軀枯槁鬢如霜嗟爾妙齡赴北邙枕上簪纓新涕

淚篋中衣帶舊薰香巢寒老鶴空垂翅雲暗哀猿更  
斷腸夜帳夢回呼不應半窻燈火照淒涼

思女

我女歸泉已半年殘生默默似寒蟬虛齋日永添衰  
病孤榻雨昏撲懶眠火滅鑪中香暗斷塵飛臺上鏡  
空懸忽看梁燕將雛去不覺淚痕滿几筵

次謝伴菊隱見寄

遠枉新詩見老成感思更爲復鍾情浮花浪蘂三春  
恨病草朽根幾日榮夜雨挑燈心最苦曉窗攬鏡眼  
偏驚梧桐昨夢夢中事事事搔頭白髮生



除夜書懷

紅爐火盡夢初驚，碧瓦霜飛天未明。  
萬境沈沈收衆籟，孤燈默默照殘更。  
鶴癯難割哺雛愛，牛老寧忘舐犢情。  
獨據病牀空守歲，一心百感拂還生。

丁巳新年

老來筋力等吳蠶，疎懶偏貪午睡酣。  
臘雪明殘北竹北，春風暗動南梅南。  
保身只擬學龜六，齊物何須辨馬三。  
起聽鳥聲時側耳，雙蓬衰鬢白鬢鬢。

追悼木先生

夙向經筵爲碩儒，又將韶畧壓孫吳。  
德容曾比古君

子氣節猶稱大丈夫，華表影孤臨遼海。  
白雲路斷隔方壺，淒涼一紀梧桐夢。  
空奉煮蒿撫病軀。

次韻鴻漸鳴君見示

知友盍簪舞乃公，交情鄭直一篇中。  
酒顏如日懶開眼，詩口似簧好鼓隴。  
榮辱齊歸槐國夢，雌雄漫說楚臺風。  
此時此會須長記，心事多君與我同。

戊午新年

世故銷磨鐵肺肝，不堪衰鬢雪霜寒。  
吳鷹翅短心猶在，屈馬齒長力僅殘。  
了事居常輸一著，奉身時復避三端。  
春風慚愧陶弘景，神武門高未掛冠。



已未新年

穆穆皇風自鄱京韶光衣被廣陵城霞蒸海嶽紅初  
動草深池塘青漸繁容膝竊安宮一畝梳頭巧理雪  
千莖天恩君澤皆高大穩撮典謨坐夏正

仲秋初六公宴應

命并序

孟門之木鄧林之材鬱葱輪奐直抵霄漢者以其  
有根本也我

君侯之於國家蓋亦如是

顯高祖

自得公嘗以元和已未益封自紀徙菽今茲元文四  
年乃其再周幹支而闔境穆如人皆得享優游之  
樂豈非因其本固根深之所致哉於是

侯宿戒樽俎親觴群臣鐘鼓舞蹈追廣功德欣戴之  
忱不勝聳悚謹奉

嚴命用進擊壤

信陽萃胄舊風流奕世人稱

菽國侯烈祖威名欽備績慈孫德業仰嘉猷移

封曾向金湯地上歲宣臨已未秋此日公堂同

賜宴史臣稽古祝鴻休



嚴鳴華表宣成

天開嚴鳴鎮山陽華表宣成  
神德彰鉅柱撐空垂蟬竦飛梁跨海舞鸞鳳潮回御  
沼勢逾峻日拂扶桑影最長作記不辭勞翰墨願憑  
穰福奉餘光

華表已成  
君侯命余作記藏諸

神廟故句中及

庚申新年

雨聲夜歛讀書堂起向朝暉披鷓鴣沙草園花新氣  
象海霞鳴霧舊文章王家多癖癖非癖賀監是狂狂  
豈狂老境春來須美酒如飴世味不堪嘗

川上作

川上群山走翠蛟幽尋到處有衡茅雨過巖岬雲初  
駁水落洲沙舟屢膠竹樹高低圍北野桑麻遠近蔽  
西郊老農若問遲留意欲向此中學許巢

次韻偶成

世態人情翻覆中紛紛得喪復何窮雞蠅半夜誤傾  
耳鹿馬千年謾轉隴筆下徒勞扛鼎力鼻端枉費運  
斤風範馳詭遇一塗轍未必良工勝賤工

秋日與桃溪藤兄同遊川上

天將秋霽助舟行桂棹來尋鷗鷺盟萬嶽北支山勢



臨川全集 卷之二  
險一川南下水容平香魚出網金爲膾老芋登盤銀  
作羹此際此遊須我輩烟波那解着簪纓

悼東陽生

去年計至自西都嗟子功名未半途遺跡空添新鬼  
錄孤魂定戀舊粉榆文章往往追陳阮詩律時時闕  
范蘇一片瑞龍山上石遙標馬鬣寫悲夫

辛酉新年

蝸殼雞窻向曙開熙然恰似上春臺扶桑日當金城  
出巖鳴雲從滄海來氣節猶存三畝竹風標自保一  
籬梅坐斟新釀酬新歲深荷漢家容老枚

臨川全集卷二畢







